

Li pîlau èt l' cwârbau d'après Florian

I tchante po passer s' timps, ragaîyi l' maujonéye.
Moussî d' totes lès coleûrs, èt su sès quate fistus,
I n' dimande nin grand tchôse, c'è-st-à pwin.ne s'i mougnetéye,
Li pîlau rapaujetéye tos lès cis què l' choûtenut.
Di l'ôte costé dèl place, on cwârbau qui bwêrléye
Po-z-awè à mognî dau matin jusqu'à l' nêt :
Tanis', odis', gueûlaud, laîde bièsse, tote èpoltéye,
I rèclame do fromadje, pwin èt tchau fait-à fait.
Tote li famille si prèsse po l' sièrvu èt l' fé taîre,
Dismètant qui l' pîlau n' vike vormint qu' po tchanter ;
Qu'i n' tûzereut à rin d'ôte qui d' fé plaîji, complaîre,
On rovîye dè l' sognî, d'î waîtî, d' l'abwèssener.
Mins l' pîre, maugré tot ça, c'èst qu' lès cis què l' choûtin.n'
Aurdin.n' leû bouche au laudje come po l' plu mia oyu
Èt s' vanter tos costés qu' c'èst l' mèyeû ! I rovyin.n'
Qui quand l' botéye èst sètche èt l' batch vûde, t'ès nèlu.
On bia djoû, au matin, on l'a r'trové rwèd mwârt :
« Nosse pîlau ! Qué maleûr ! Li qui tchanteut si bin !
– Di trop c'èst d' trop ! », di-st-i l' cwârbau : « Il a yeû twârt
Di s' todi fé passer po l' pus bia, l' pus malin ! »
On-z-ètind co bin dîre qu'on gangnereut d' pus à s' taîre ;
Qui l' Walon n'èst jusse bon qu'à r'nicter, maroner,
Dîre à dèl cis qu'i-gn-a : « Mèlez vos d' vos-afaîres !
Ci qui n' tchaufe nin por vos, choûtez m', lèyiz l' brûler ! »
C'èst l' moyin d' fé comprinde qu'on vike tortos à s' môde ;
Qu'on-z-a bin gangnî l' drwèt d' mognî quand on-z-a fwim.
Qui c'èst fwârt malauji di s' mète à l' place d'on' ôte,
C'èst nin pace qu'on n' dit rin, qu' c'èst preûve qui tot va bin.

Albert Delvaux

Octôbe 2014